

Horum reditus, uti & Ecclesiasticorum, excedunt millionem coronatorum.

*Reditus
annui regni
Portugal-
liæ.*

Ordinarii reditus regni hujus annuatim ascendunt ad 110000 ducat. Reditus autem Magistratuum militarium, quorum Rex ipse hodie magister est, quique possident insulas Azores, Maderam, insulas Capitis Viridis, S. Thomæ, quotannis reddunt 200000 ducat. Reditus Castellum de Mina in Guinea, qui ad ordinis Christi magisterium pertinent, 100000 ducat. Reditus Brasiliæ, 150000 duc. Vestigalia aromatum aliarumque mercium, quæ ex India Orientali quotannis in Portugalliam invehuntur, 600000 duc. sive 18 tonnas auri, ut Belgæ vocant. Nam quæ in ipsa India è vestigalibus aut tributis quocunque modo percipiuntur, ibidem rursus impenduntur, ita ut Rex nullum illius emolumentum capiat. In summa reditus annui regni Portugalliæ sunt 2200000 duc. aut 66 tonnae auri, ut nostrates vocant. Quomodo vero & in quos usus hæc expendantur, vide apud Iann. Hugonis Linscotanum.

*Familie
nobiles.*

Familias nobiles Portugalliæ apud Conestagium invenio: Alencastro, Almeida, Azevedo, Alcazova, Barreto, Botello, Britto, Castro, Coutigno, Gama, Lopes, Lobos, Mascarenias, Mattos, Meneses, Mello, Norogna, Payva, Pereira, Pinto, Portugal, Saa, Sequeira, Sosa, Sylva, Tavora, Tello, Vaz, Vasconcel, Veloso.

*A Portu-
gallis via
adaperta in
Indiam.*

Henricus Regis Eduardi frater occasionem præbuit regni fines extendendi. Primus enim ignotum nostris mare tentare ausus, Maderam superavit, quæ tum quidem arboribus undique consita, exiguum spem faciebat majoris boni, sed incendio absumtis arboribus, depressum terram esse vini, sacchari, aliarumque rerum fecundissimam. Inde soluta navi Fortunatas insulas, Canarias vocant, adortus

est, circumvectusque Meridionalem Africam, offendit multa, quæ posteris usui fuerunt. Elapsis aliquot deinceps annis Rex Emmanuel magna classe Occidentem, Meridiem, Orientem tentavit, viamque è Portugallia ad Indos invenit. Hinc factum, ut posteriores reges decorati fuerint titulis Portugalliæ, Algarbiæ, Guineæ, Æthiopiarum, Arabiarum, Persiarum, & Indiæ, qui omnes tituli nunc ad Regem Hispaniarum devoluti sunt, interemto in Africa ultimo Rege Sebastiano.

Sub Portugalliæ regno hoc tempore Algarbiæ regnum est, in quo Ana fluvius, quo è superioribus Hispaniarum partibus ad portus marinos feruntur vina nobiliora, Secca, Bastarda, & Romana. Ora maritima ferax est olei, ficuum, uvularum passarum, & suberis, quæ mercatores Belgæ navibus perentes varie postea distrahunt.

*Algarbiæ
regnum.*

Apud quosdam, præsertim Thuanum, Lusitania in Algarbiam & Portugalliam dividitur. quarum illa ad Meridiem, hæc ad Septentriones posita est. Algarbia continet quatuor civitates, sub uno Episcopatu, Tavilam, Lagos, Silves & Faro. quarum Tavila & Lagos portus habent percommodos. Superato autem promontorio S. Vincentii, antiquis sacro, portum insuper habet Villæ-Novæ, præter alios minores. Ab Arabibus nomen accepit, significatque Algarbia campum arvumque felix & uber, in quo omnia ad commutationem necessaria.

*Nomen un-
de.*

Comitatus ab initio cum esset, in dotem ab Alphonso x Legionis rege, ut prisca referunt annales, datus fuit Alphonso III Portugalliæ Regi, quum filiam ipsius Beatricem, quam ex pellice genuerat, uxorem duceret. Natus ex hoc matrimonio Dionysius, qui primus Algarbiarum regis titulum usurpare cœpit.

*Regni ori-
go.*

